



KVARTALNI EKONOMSKI TRENDovi

FEDERACIJE BOSNE I HERCEGOVINE

1Q 2026

KVARTALNI EKONOMSKI TRENDovi
FEDERACIJE BOSNE I HERCEGOVINE
1Q 2026

SADRŽAJ

LISTA GRAFIKONA	4
LISTA TABELA	4
IZVRŠNI SAŽETAK	5
1. MEĐUNARODNO OKRUŽENJE	6
2. REALNI SEKTOR	9
2.1. Bruto domaći proizvod	9
2.2. Industrijska proizvodnja	10
2.3. Građevinarstvo	11
2.4. Trgovina	12
2.5. Ostale uslužne djelatnosti	13
2.6. Turizam	13
2.7. Zaposlenost	14
2.8. Plate	15
3. CIJENE	17
4. TRGOVINSKA RAZMJENA FBIH	18
5. FISKALNA POLITIKA	20
Javni prihodi	20
5.1. Prihodi od indirektnih poreza	20
5.2. Prihodi od direktnih poreza	21
5.3. Udio javnih prihoda u BDP-u	21
5.4. Javni dug	22
5.5. Penzije i doprinosi	23
6. FINANSIJSKO TRŽIŠTE	24
6.1. Profitabilnost banaka	24
6.2. Efektivna kamatna stopa	24
6.3. Krediti	25
6.4. Koncentracija bankarskog tržišta	26

LISTA GRAFIKONA

Grafikon 1: Kretanje BDP-a EU i ekonomija sa kojima FBiH ostvaruje najveći udio u izvozu, Q/Q-1.....	6
Grafikon 2: Eurozone Composite PMI indeks (Kompozitni indeks menadžera nabavke).....	6
Grafikon 3: Kretanje cijena u EU i odabranim zemljama (HICP – godišnja stopa promjene) – lijevo; Doprinos godišnjoj inflaciji Eurozone po grupacijama (u procentnim poenima) - desno.....	7
Grafikon 4: Kretanje cijena energenata na tržištu	7
Grafikon 5: Kretanje cijena industrijskih roba na tržištu.....	8
Grafikon 6: Kretanje EURIBOR kamatnih stopa.....	8
Grafikon 7: Stope realnog rasta, cijene 2021. godine	9
Grafikon 8: Industrija ukupno, januar 2021. - mart 2026.	10
Grafikon 9: Indeksi proizvodnje u građevinarstvu, kvartalne vremenske serije, ukupno	11
Grafikon 10: Broj noćenja turista	13
Grafikon 11: Administrativni podaci broja zaposlenih, nezaposlenih i promjene u odnosu na isti kvartal prethodne godine	14
Grafikon 12: Stopa aktivnosti, stopa zaposlenosti i stopa nezaposlenosti (desna skala); anketni broj zaposlenih, nezaposlenih i neaktivnih osoba (u hiljadama – lijeva skala)	15
Grafikon 13: Iznos neto, bruto i realne plate	16
Grafikon 14: Kretanje indeksa potrošačkih cijena (CPI)*.....	17
Grafikon 15: Kretanje cijena proizvođača industrijskih proizvoda.....	17
Grafikon 16: Obim vanjske trgovine Federacije BiH sa inostranstvom (mil. KM).....	18
Grafikon 17: Izvoz i uvoz FBiH po zemljama sa kojima se ostvaruje najveći obim vanjskotrgovinske razmjene ..	18
Grafikon 18: Prihodi od indirektnih poreza doznačeni FBiH, mil. KM	20
Grafikon 19: Prihodi od direktnih poreza, doprinosa i neporeznih prihoda u FBiH, mil. KM	21
Grafikon 20: Udio javnih prihoda u FBiH u BDP-u, %	22
Grafikon 21: Javni dug u FBiH (mil. KM), udio javnog duga u BDP-u, desna skala	22
Grafikon 22: Isplaćene penzije i doprinosi za PIO (hilj. KM), pokrivenost penzija doprinosima za PIO (%), desna skala.....	23
Grafikon 23: Neto dobit banaka u FBiH, hilj. KM.....	24
Grafikon 24: Prosječna ponderisana EKS na novoodobrene kredite u FBiH	25
Grafikon 25: Krediti stanovništvu i pravnim licima u FBiH, mlrd. KM.....	25
Grafikon 26: Koncentracija bankarskog tržišta.....	26
Grafikon 27: Herfindahlov indeks (kreditu)	26

LISTA TABELA

Tabela 1. Kvartalni bruto domaći proizvod, stope realnog rasta	9
Tabela 2. Industrijska proizvodnja, kvartalne stope promjena, Q/Q-1 (sezonski prilagođene).....	10
Tabela 3. Industrijska proizvodnja, kvartalne stope promjena, Q/Q-4 (kalendarski prilagođene).....	11
Tabela 4. Proizvodnja u građevinarstvu, kvartalne stope promjena, Q/Q-1 (sezonski prilagođene)	11
Tabela 5. Proizvodnja u građevinarstvu, kvartalne stope promjena, Q/Q-4 (kalendarski prilagođene)	12
Tabela 6. Trgovina na malo, kvartalne stope promjena, Q/Q-1 (sezonski prilagođene).....	12
Tabela 7. Trgovina na malo, kvartalne stope promjena, Q/Q-4 (kalendarski prilagođene).....	12
Tabela 8. Ostale uslužne djelatnosti, kvartalne stope promjena	13

IZVRŠNI SAŽETAK

U prvom kvartalu 2026. godine privreda Federacije Bosne i Hercegovine nastavila je umjeren rast, uprkos nepovoljnim međunarodnim okolnostima. Ekonomska aktivnost u Evropskoj uniji ostala je slaba, uz skroman rast BDP-a, blago povišenu inflaciju i izražen rast cijena energenata, što je povećalo troškovne pritiske na domaću ekonomiju, dok su cijene industrijskih sirovina imale različita kretanja.

Realni BDP Federacije BiH povećan je za 1,9% u odnosu na isti kvartal prethodne godine. Rast je zabilježen u građevinarstvu, finansijskim djelatnostima, informacijsko-komunikacijskom sektoru, trgovini i turizmu, dok je industrijska proizvodnja predstavljala glavno ograničenje ukupne ekonomske aktivnosti zbog izraženog pada rudarstva i prerađivačke industrije. U prvom kvartalu 2026. godine, ukupna kalendarski prilagođena industrijska proizvodnja manja je za 4,7% u odnosu na prvi kvartal 2025. godine. Građevinarstvo je zadržalo stabilan uzlazni trend, promet u trgovini na malo nastavio je rasti, a turistički sektor ostvario je veći broj noćenja nego godinu ranije.

U odnosu na posljednji mjesec prvog kvartala prethodne godine, u martu 2026. godine, cijene u Federaciji BiH su u prosjeku porasle za 5,2%. Cijene hrane su porasle za 3,6%, cijene energije za 8,0%, dok su cijene transporta više za 13,3%.

Na tržištu rada administrativni pokazatelji ukazuju na blago smanjenje zaposlenosti u odnosu na prethodni kvartal, dok anketni podaci potvrđuju povoljnija međugodišnja kretanja zaposlenosti i nezaposlenosti. Istovremeno je nastavljen rast nominalnih plata, ali su inflatorni pritisci ostali izraženi, posebno kod hrane, energije i transporta.

Vanjskotrgovinska razmjena obilježena je sporijim rastom izvoza od uvoza, što upućuje na nastavak pritiska na trgovinski bilans. U odnosu na isti kvartal prethodne godine, u prvom kvartalu 2026. godine zabilježen je rast izvoza od 0,4% i rast uvoza od 6,1%.


Fiskalni pokazatelji ostali su relativno stabilni, uz međugodišnji rast poreznih prihoda, ali i smanjenje prihoda od doprinosa, te pogoršanje pokrivenosti penzija doprinosima. U finansijskom sektoru ostvaren je rast kreditne aktivnosti, uz umjerene kamatne stope i pozitivnu profitabilnost bankarskog sistema, iako je na međunarodnim finansijskim tržištima zabilježeno povećanje EURIBOR stopa.

Posmatrano u cjelini, prvi kvartal 2026. obilježava nastavak ekonomskog rasta umjerenog intenziteta, uz povećane rizike koji proizlaze iz slabe industrijske aktivnosti, vanjskih troškovnih pritisaka i geopolitičke neizvjesnosti.

1. MEĐUNARODNO OKRUŽENJE

Prema kvartalnim podacima EUROSTAT-a, od 04.08.2026. godine, zabilježen je skroman rast ekonomske aktivnosti na nivou prosjeka zemalja EU 27. U prvom kvartalu 2026. godine, zabilježeno je povećanje BDP-a za 0,1% u odnosu na prethodni kvartal (Grafikon 1), dok je u poređenju sa istim kvartalom prethodne godine zabilježena godišnja stopa rasta EU 27 od 0,8%.

Grafikon 1: Kretanje BDP-a EU i ekonomija sa kojima FBiH ostvaruje najveći udio u izvozu, Q/Q-1




Izvor: EUROSTAT

Ekonomska aktivnost u zemljama u koje Federacija Bosne i Hercegovine najviše izvozi bilježi pozitivna kretanja. Najveći rast BDP-a u prvom kvartalu 2026. godine, u odnosu na prethodni kvartal, zabilježen je u Sloveniji (0,7%), Njemačkoj (0,4%) i Italiji (0,3%). U poređenju sa istim kvartalom prethodne godine, Srbija, Slovenija i Hrvatska su ostvarile najveći rast BDP-a od 3,1%, 3,1% i 2,4%, respektivno.

Kompozitni indeks menadžera nabavke (Purchasing Managers Index – PMI) eurozone, tokom prvog kvartala 2026. godine nastavio je pozitivan trend kretanja u zoni ekspanzije. Na kraju kvartala iznosio je 50,7, što je u odnosu na kraj prethodnog kvartala, niže za 0,8 indeksna poena, a na najnižem nivou od juna 2025. godine, kao posljedica stagnacije u uslužnom sektoru.

Grafikon 2: Eurozone Composite PMI indeks (Kompozitni indeks menadžera nabavke)




Izvor: <https://www.investing.com/economic-calendar/s-p-global-composite-pmi-1491>

Inflacija u zemljama EU (HICP) tokom prvog kvartala 2026. godine i dalje je blaga, pri čemu je na kraju kvartala zabilježena godišnja stopa rasta cijena od 2,8%, za 0,3 p.p. viša u odnosu na kraj istog kvartala prethodne godine. Usluge zadržavaju trend značajnog doprinosa ukupnom rastu cijena u zemljama Eurozone (1,49 p.p.), dok kategorije hrana i energija učestvuju sa 0,27 p.p. i 0,48 p.p., respektivno.

Od zemalja sa kojima FBiH ostvaruje najveći obim vanjskotrgovinske razmjene, u Njemačkoj, Hrvatskoj i Austriji, u martu mjesecu 2026. godine, zabilježena je godišnja inflacija od 2,8%, 4,6% i 3,2%, respektivno, u poređenju sa istim periodom prethodne godine.


Grafikon 3: Kretanje cijena u EU i odabranim zemljama (HICP – godišnja stopa promjene) – lijevo; Doprinosi godišnjoj inflaciji Eurozone po grupacijama (u procentnim poenima) - desno



Izvor: EUROSTAT

Tokom prvog kvartala 2026. godine, zabilježeno je značajno povećanje cijena na međunarodnim tržištima nafte, uzrokovano konfliktom na Bliskom Istoku i zatvaranjem Hormušskog moreuza. Cijena barela nafte tipa Brent, na kraju prvog kvartala, iznosila je 103,97 USD, što je za 70,9% viša u odnosu na kraj prethodnog kvartala (Grafikon 4), dok je za 39,1% viša u odnosu na kraj istog kvartala prethodne godine.


Grafikon 4: Kretanje cijena energenata na tržištu



Izvor: <https://tradingeconomics.com>

Cijena sirove nafte na američkom tržištu, na kraju prvog kvartala 2026., iznosila je 101,38 USD/barel, za 76,6% viša u odnosu na prethodni kvartal, a za 41,8% viša u odnosu na kraj istog kvartala prethodne godine. Na evropskom tržištu prirodnog gasa (TTF), na kraju prvog kvartala 2026. godine, trgovalo se po cijeni od 50,76 EUR/MWh, koja je u odnosu na cijene na kraju prethodnog kvartala viša za 80,3%, a u poređenju sa istim periodom prethodne godine viša za 25,4%.

Grafikon 5: Kretanje cijena industrijskih roba na tržištu




Cijene odabranih industrijskih roba na tržištu, tokom prvog kvartala 2026. godine bilježile su različita kretanja. Cijena bakra na kraju marta iznosila je 5,59 američkih dolara po funti (1 funta = 0,453592 kg), što je u odnosu na kraj prethodnog kvartala niža za 1,7%. Cijena čelične armature na kraju prvog kvartala viša je za 0,9%, dok je cijena aluminija porasla za 14,5%.

Izvor: <https://tradingeconomics.com>

Vrijednosti ključnih kamatnih stopa Evropske centralne banke tokom prvog kvartala 2026. godine nisu zabilježile promjene, ali su EURIBOR kamatne stope u martu mjesecu bilježile povećanje. Na kraju prvog kvartala, 12-mjesečni i 6-mjesečni EURIBOR iznosili su 2,870% i 2,475%, respektivno, sa povećanjem u odnosu na prethodni kvartal za 0,627 p.p. odnosno 0,368 p.p.

Grafikon 6: Kretanje EURIBOR kamatnih stopa



Izvor: <https://www.euribor-rates.eu/>

2. REALNI SEKTOR

2.1. Bruto domaći proizvod

Pozitivna međugodišnja stopa rasta BDP-a zabilježena je 21. kvartal uzastopno, što ukazuje na nastavak kontinuiranog, ali usporenog rasta ekonomske aktivnosti.

Grafikon 7: Stope realnog rasta, cijene 2021. godine



Izvor: Federalni zavod za statistiku

U prvom kvartalu 2026. godine nominalni bruto domaći proizvod iznosio je 9.224,7 mil. KM. Realni rast BDP-a u prvom kvartalu 2026. godine, u odnosu na isti kvartal prethodne godine, iznosio je 1,9% (Tabela 1). Posmatrano po područjima KD BiH 2010, najznačajnije realne stope rasta bruto dodane vrijednosti ostvarile su Finansijske djelatnosti i djelatnosti osiguranja (K), sa rastom od 6,2%, Informacije i komunikacije (J), sa rastom od 5,4%, te Građevinarstvo (F), sa rastom od 3,9%.

Realni pad bruto dodane vrijednosti zabilježen je u djelatnostima Poljoprivreda, šumarstvo i ribolov (A) u iznosu od 3,3%, Vađenje ruda i kamena, Prerađivačka industrija, Proizvodnja i snabdijevanje električnom energijom, Snabdijevanje vodom (B,C,D,E) zbirno od 0,9%. Posebno je izražen pad zabilježen u Prerađivačkoj industriji (C), gdje je bruto dodana vrijednost smanjena za 1,7%.

Tabela 1. Kvartalni bruto domaći proizvod, stope realnog rasta

	2023				2024				2025 ¹⁾				2026 ¹⁾			
	Q1	Q2	Q3	Q4	Q1	Q2	Q3	Q4	Q1	Q2	Q3	Q4	Q1	Q2	Q3	Q4
Nedesezonirani podaci, Q/Q-4	1,1	0,7	2,3	4,0	4,6	4,1	3,2	2,1	1,5	2,3	1,5	2,2	1,9			
Desezonirani podaci, Q/Q-1	0,5	0,6	1,3	1,4	1,0	0,2	0,7	0,2	0,5	0,8	0,1	0,8	0,3			
Finalni trend, Q/Q-1	0,3	0,7	1,1	1,2	0,9	0,5	0,4	0,4	0,5	0,5	0,4	0,5	0,5			

1) Procjena


Izvor: Federalni zavod za statistiku

2.2. Industrijska proizvodnja

U prvom kvartalu 2026. godine industrijska proizvodnja u Federaciji BiH bilježi negativna kretanja, prvenstveno usljed pada proizvodnje u rudarstvu i prerađivačkoj industriji. Ukupni pokazatelji sugeriraju postepeno prilagođavanje industrije tržišnim uslovima, uz izraženu neizvjesnost u pogledu daljeg kretanja proizvodnje.

Prema mjesečnim pokazateljima, ukupna desezonirana industrijska proizvodnja u martu 2026. godine, u odnosu na februar 2026. godine, veća je za 1,1%, što može ukazivati na blago povećanje proizvodne aktivnosti. Kalendarski prilagođena industrijska proizvodnja u FBiH, u martu 2026. godine, manja je za 1,0% u odnosu na mart 2025. godine (Grafikon 8).

Grafikon 8: Industrija ukupno, januar 2021. - mart 2026.



Izvor: Federalni zavod za statistiku

U prvom kvartalu 2026. godine, u odnosu na prethodni kvartal, ukupna sezonski prilagođena industrijska proizvodnja manja je za 3,5% (Tabela 2). Zabilježen je pad obima industrijske proizvodnje u područjima Rudarstva (-18,1%), Prerađivačke industrije (-1,4%), te Proizvodnje i snabdijevanja električnom energijom i plinom (-2,1%).

Tabela 2. Industrijska proizvodnja, kvartalne stope promjena, Q/Q-1 (sezonski prilagođene)

	2023				2024				2025				2026			
	Q1	Q2	Q3	Q4	Q1	Q2	Q3	Q4	Q1	Q2	Q3	Q4	Q1	Q2	Q3	Q4
Industrija ukupno	0,3	-1,8	1,1	-5,3	2,1	-3,4	1,9	-1,4	1,7	0,0	-2,9	1,7	-3,5			
Vađenje ruda i kamena	-0,9	0,2	-1,2	-4,9	3,1	-8,7	8,4	-5,9	6,5	-5,9	-4,9	2,2	-18,1			
Prerađivačka industrija	-1,0	-3,8	2,8	-5,3	1,8	-4,3	0,5	-0,1	1,8	0,6	-2,6	0,7	-1,4			
Proiz. i opskrba el. energijom i plin	7,2	8,4	-8,2	-4,6	4,0	3,0	5,7	-5,7	0,4	-0,3	-5,7	9,4	-2,1			

Izvor: Federalni zavod za statistiku

U prvom kvartalu 2026. godine, ukupna kalendarski prilagođena industrijska proizvodnja manja je za 4,7% u odnosu na prvi kvartal 2025. godine (Tabela 3). Zabilježeni pad obima industrijske proizvodnje rezultat je oštrog pada proizvodnje u području Rudarstva (-25,2%) i

umjerenog pada u Prerađivačkoj industriji (-3,0%). Proizvodnja i snabdijevanje električnom energijom i plinom je blago rasla (0,7%).

Tabela 3. Industrijska proizvodnja, kvartalne stope promjena, Q/Q-4 (kalendarski prilagođene)


	2023				2024				2025				2026			
	Q1	Q2	Q3	Q4	Q1	Q2	Q3	Q4	Q1	Q2	Q3	Q4	Q1	Q2	Q3	Q4
Industrija ukupno	-3,4	-6,2	-0,4	-6,0	-4,3	-5,5	-4,9	-0,9	-1,5	2,5	-2,6	0,6	-4,7			
Vađenje ruda i kamena	-11,6	-14,8	-9,2	-6,3	-3,4	-12,1	-2,7	-3,9	-1,5	2,1	-10,0	-1,6	-25,2			
Prerađivačka industrija	-2,5	-6,7	-0,2	-7,4	-4,9	-5,0	-7,3	-2,4	-2,6	3,1	-0,3	0,3	-3,0			
Proiz. i opskrba el. energijom i plin	-5,3	1,7	2,2	1,7	-1,0	-6,3	8,1	7,3	3,1	-0,3	-11,3	2,6	0,7			

Izvor: Federalni zavod za statistiku

2.3. Građevinarstvo

U strukturi ukupne građevinske aktivnosti u prvom kvartalu 2026. godine objekti visokogradnje učestvovali su sa 41,0%, dok je učešće objekata niskogradnje iznosilo 59,0%. Indeksi proizvodnje u građevinarstvu nastavljaju stabilan rast. Pozitivna dinamika građevinske aktivnosti nastavila se i u prvom kvartalu 2026. godine. Ovakva dinamika ukazuje na otpornost i dugoročno pozitivnu putanju građevinskog sektora.

Grafikon 9: Indeksi proizvodnje u građevinarstvu, kvartalne vremenske serije, ukupno



Izvor: Federalni zavod za statistiku

Ukupna desezonirana proizvodnja u građevinarstvu u prvom kvartalu 2026. godine, u poređenju s prethodnim kvartalom, zabilježila je rast od 0,5%. Posmatrano prema vrsti građevinskih objekata, u istom periodu, na objektima visokogradnje zabilježen je rast od 0,4%, a na objektima niskogradnje rast od 0,6% (Tabela 4).

Tabela 4. Proizvodnja u građevinarstvu, kvartalne stope promjena, Q/Q-1 (sezonski prilagođene)

	2023				2024				2025				2026			
	Q1	Q2	Q3	Q4	Q1	Q2	Q3	Q4	Q1	Q2	Q3	Q4	Q1	Q2	Q3	Q4
Ukupno	1,0	0,1	0,7	0,4	0,5	1,1	0,7	0,8	0,5	0,7	0,6	0,6	0,5			
Visokogradnja	0,2	-0,2	0,1	0,0	0,8	0,9	0,5	0,8	0,3	0,6	0,6	0,8	0,4			
Niskogradnja	1,6	0,3	1,1	0,6	0,3	1,2	0,7	1,0	0,5	0,5	0,6	0,5	0,6			

Izvor: Federalni zavod za statistiku

Ukupna kalendarski prilagođena proizvodnja u građevinarstvu u prvom kvartalu 2026. godine, veća je za 2,8%, u poređenju sa istim kvartalom 2025. godine. Posmatrano prema vrsti građevinskih objekata, u istom periodu na objektima visokogradnje zabilježen je rast od 2,4%, a na objektima niskogradnje rast od 3,1% (Tabela 5).

Tabela 5. Proizvodnja u građevinarstvu, kvartalne stope promjena, Q/Q-4 (kalendarski prilagođene)

	2023				2024				2025				2026			
	Q1	Q2	Q3	Q4	Q1	Q2	Q3	Q4	Q1	Q2	Q3	Q4	Q1	Q2	Q3	Q4
Ukupno	2,2	1,6	2,2	2,4	1,3	2,3	2,5	3,6	3,6	2,5	2,1	2,3	2,8			
Visokogradnja	1,3	0,8	0,4	0,1	0,4	1,8	2,1	3,4	2,5	1,9	2,0	2,5	2,4			
Niskogradnja	2,9	2,1	3,3	3,9	1,8	2,7	2,7	3,7	4,2	2,9	2,2	2,1	3,1			

Izvor: Federalni zavod za statistiku

2.4. Trgovina

Sezonski prilagođeni ukupan promet trgovaca na malo¹ – oblast 47 realno je povećan za 1,1% u prvom kvartalu 2026. godine u odnosu na prethodni kvartal (Tabela 6).

Tabela 6. Trgovina na malo, kvartalne stope promjena, Q/Q-1 (sezonski prilagođene)

	2023				2024				2025				2026			
	Q1	Q2	Q3	Q4	Q1	Q2	Q3	Q4	Q1	Q2	Q3	Q4	Q1	Q2	Q3	Q4
Promet trgovaca na malo, nominalno	1,5	1,7	4,0	1,8	1,7	0,4	1,2	1,4	-0,6	5,2	-1,7	1,6	1,9			
Promet trgovaca na malo, realno	1,8	1,3	3,0	2,0	1,5	0,3	1,7	1,0	-0,5	5,5	-2,0	1,6	1,1			

Izvor: Federalni zavod za statistiku

Kalendarski prilagođeni ukupan promet trgovaca na malo - oblast 47 realno je rastao za 7,1%, u prvom kvartalu 2026. godine, u odnosu na isti kvartal 2025. godine (Tabela 7).

Tabela 7. Trgovina na malo, kvartalne stope promjena, Q/Q-4 (kalendarski prilagođene)

	2023				2024				2025				2026			
	Q1	Q2	Q3	Q4	Q1	Q2	Q3	Q4	Q1	Q2	Q3	Q4	Q1	Q2	Q3	Q4
Promet trgovaca na malo, nominalno	10,0	8,1	9,9	9,1	9,4	8,8	5,0	4,6	2,0	7,9	3,8	4,5	7,4			
Promet trgovaca na malo, realno	0,7	4,8	7,1	8,5	7,8	7,8	5,5	4,3	1,6	8,3	3,5	5,2	7,1			

Izvor: Federalni zavod za statistiku

Ukupan neprilagođeni promet od trgovine na malo, u martu 2026., u odnosu na mart 2025. godine, porastao je za 20,8%. Najveći uticaj na rast nominalnog neprilagođenog prometa, u martu 2026., u odnosu na mart 2025. godine, imali su: Motorna goriva i maziva u iznosu od 23,8% i uticajem od 1,2; Apoteke, medicinski i ortopedski proizvodi, kozmetički i toaletni proizvodi u iznosu od 28,4% i uticajem od 1,0%; Nespecijalizirane prodavnice živežnim namirnicama u iznosu od 15,1% i uticajem od 1,0%.

¹ Indeks prometa trgovine na malo obuhvata aktivnosti preprodaje robe krajnjim potrošačima za ličnu potrošnju ili upotrebu u domaćinstvima. Indeks prikazuje promjene nivoa ostvarenog prometa (nominalne i realne vrijednosti). Primjenjuje se i za procjenu rezultata maloprodajnog sektora, potrošnje stanovništva kao i pri izračunu nacionalnih računa. Nominalni indeksi prikazuju kretanje prometa u tekućim cijenama, a realni indeksi prikazuju kretanje prometa u stalnim cijenama. Realni indeksi dobiveni su deflacioniranjem nominalnih vrijednosti prometa prilagođenim indeksom potrošačkih cijena (CPI-Consumer price Index).

2.5. Ostale uslužne djelatnosti

U prvom kvartalu 2026. godine promet ostalih uslužnih djelatnosti bilježi blaga negativna kretanja na kvartalnom nivou, dok je na godišnjem nivou zadržan rast.

Ukupni sezonski prilagođeni promet ostalih uslužnih djelatnosti pao je za 0,2%, u odnosu na prethodni kvartal (Tabela 8). Za isti period, sezonski prilagođeni promet u području I – Hotelijerstvo i ugostiteljstvo bilježi rast od 2,7%.

Ukupni kalendarski prilagođeni promet ostalih uslužnih djelatnosti, u prvom kvartalu 2026. godine, bilježi rast od 4,8% u odnosu na isti kvartal 2025. godine (Tabela 8). Za isti period, kalendarski prilagođeni promet u području I - Hotelijerstvo i ugostiteljstvo bilježi rast od 12,6%. Najveći pad kalendarski prilagođenog prometa zabilježen je u području M – Stručne, naučne i tehničke djelatnosti od 3,3% u odnosu na isti kvartal prethodne godine.

U ukupnom prometu ostalih uslužnih djelatnosti, najveće učešće ostvareno je u području J – Informacije i komunikacije (47,7%) i području M - Stručne, naučne i tehničke djelatnosti (21,2%). Učešće svih ostalih djelatnosti je 31,1%.

Tabela 8. Ostale uslužne djelatnosti, kvartalne stope promjena


	2023				2024				2025				2026			
	Q1	Q2	Q3	Q4	Q1	Q2	Q3	Q4	Q1	Q2	Q3	Q4	Q1	Q2	Q3	Q4
Desezonirani podaci, Q/Q-1	4,6	-0,3	4,1	-0,4	9,3	0,4	2,3	4,8	0,3	-0,6	3,5	2,1	-0,2			
Kalendarski prilagođeni podaci, Q/Q-4	16,9	12,1	8,9	7,5	12,7	14,7	12,4	16,6	7,6	7,1	8,5	5,5	4,8			

Izvor: Federalni zavod za statistiku

2.6. Turizam

U prvom kvartalu 2026. godine turistička aktivnost u Federaciji BiH nastavila je pozitivan trend. Ostvareno je ukupno 415.757 noćenja turista², što predstavlja povećanje od 4,0% u odnosu na isti kvartal prethodne godine. U odnosu na prethodni kvartal broj noćenja smanjen je za 28,1%, što je uobičajeno sezonsko kretanje karakteristično za početak godine. Učešće domaćih turista u ukupnom broju noćenja iznosilo je 32,4%, a stranih turista 67,6%.

Grafikon 10: Broj noćenja turista



Izvor: Federalni zavod za statistiku

² Podaci sezonski neprilagođeni


2.7. Zaposlenost

Kvartalni podaci o tržištu rada u Federaciji Bosne i Hercegovine u prvom kvartalu 2026. godine ukazuju na pogoršanje administrativnih pokazatelja u odnosu na prethodni kvartal, koje se ogleda u smanjenju broja zaposlenih i blagom rastu broja registriranih nezaposlenih osoba. Anketni podaci također bilježe smanjenje aktivnosti i zaposlenosti u odnosu na kraj prethodne godine. Međutim, u poređenju sa istim kvartalom 2025. godine, anketni pokazatelji ukazuju na rast zaposlenosti i smanjenje nezaposlenosti.

U periodu od 2022. do 2026. godine, prema administrativnim podacima, broj zaposlenih osoba porastao je za 2,0%, dok je broj registriranih nezaposlenih smanjen za 14,6%. Znatno izraženije smanjenje broja nezaposlenih u odnosu na rast zaposlenosti ukazuje na to da kretanje evidencijske nezaposlenosti, pored zapošljavanja, odražava i druge faktore, poput izlaska iz evidencija, migracija i promjena u aktivnosti stanovništva.

Prema administrativnim podacima Federalnog zavoda za statistiku, prosječan broj zaposlenih u prvom kvartalu 2026. godine iznosio je 542.113 osoba. U poređenju s prethodnim kvartalom zabilježeno je smanjenje broja zaposlenih za 4.589, odnosno za 0,8%, dok je u odnosu na isti kvartal prethodne godine evidentirano smanjenje za 3.181 osobu, što predstavlja pad od 0,6%.

Grafikon 11: Administrativni podaci broja zaposlenih, nezaposlenih i promjene u odnosu na isti kvartal prethodne godine



Izvor: Federalni zavod za statistiku


Istovremeno, prosječan broj nezaposlenih³ osoba u prvom kvartalu 2026. godine iznosio je 254.425. Ovaj broj je u poređenju s prethodnim kvartalom veći za 721 osobu, odnosno za 0,3%. U odnosu na isti kvartal prethodne godine, broj nezaposlenih smanjen je za 4.249 osoba ili za 1,6%.

Prema anketnim podacima Federalnog zavoda za statistiku, u prvom kvartalu 2026. godine u Federaciji BiH bilo je 798 hiljada zaposlenih i 115 hiljada nezaposlenih osoba, dok su 934 hiljade osoba bile izvan radne snage. Stopa aktivnosti radno sposobnog stanovništva iznosila je 49,4%. U odnosu na prethodni kvartal stopa aktivnosti smanjena je za 2,7 p.p., dok je u poređenju sa istim kvartalom prethodne godine povećana za 0,2 p.p.

Stopa zaposlenosti u prvom kvartalu 2026. godine iznosila je 43,2%. U odnosu na prethodni kvartal smanjena je za 2,4 p.p., dok je u poređenju sa istim kvartalom prethodne godine povećana za 1,2 p.p.

Stopa nezaposlenosti iznosila je 12,6%, što je za 0,1 p.p. više u odnosu na prethodni kvartal. U poređenju sa istim kvartalom prethodne godine, stopa nezaposlenosti smanjena je za 2,0 p.p.

Grafikon 12: Stopa aktivnosti, stopa zaposlenosti i stopa nezaposlenosti (desna skala); anketni broj zaposlenih, nezaposlenih i neaktivnih osoba (u hiljadama – lijeva skala)




Izvor: Federalni zavod za statistiku

2.8. Plate

Prosječna mjesečna neto plata u martu 2026. godine iznosila je 1.700 KM, dok je prosječna bruto plata u istom mjesecu iznosila 2.658 KM. U odnosu na isti mjesec prethodne godine, prosječna neto plata veća je za 135 KM, odnosno za 8,6%, dok je prosječna bruto plata povećana za 214 KM ili za 8,8%.

³ Administrativni podaci broja zaposlenih i nezaposlenih prema evidenciji FZS i FZZZ.

Grafikon 13: Iznos neto, bruto i realne plate



Izvor: Federalni zavod za statistiku

Realna plata⁴ u martu 2026. godine iznosila je 1.243 KM. U odnosu na isti mjesec prethodne godine realna plata povećana je za približno 40 KM, odnosno za 3,3%. U periodu od marta 2022. do marta 2026. godine, nominalna neto i bruto plata bilježile su prosječan mjesečni rast od po 0,9%, dok je prosječan mjesečni rast realne neto plate iznosio 0,5%. (Grafikon 13).


⁴ Realna neto plata izračunata je deflacioniranjem nominalne neto plate indeksom potrošačkih cijena (2015 = 100) i izražena je u cijenama iz 2015. godine.

3. CIJENE

Tokom prvog kvartala 2026. godine, u FBiH zabilježen je blagi rast potrošačkih cijena. Posmatrano u odnosu na prethodni mjesec, u martu 2026. godine, cijene su u prosjeku porasle za 1,9%. Posmatrano po odjeljcima koji imaju najveću relativnu važnost, u martu 2026. godine, zabilježeno je povećanje cijena hrane za 0,5%, energije za 0,3% i transporta za 13,5%.

U odnosu na isti mjesec prethodne godine, u martu 2026. godine, cijene su u prosjeku porasle za 5,2%. Posmatrano po odjeljcima, cijene hrane su porasle za 3,6%, cijene energije za 8,0%, dok su cijene transporta više za 13,3%.

Grafikon 14: Kretanje indeksa potrošačkih cijena (CPI)*




Izvor: Federalni zavod za statistiku

*Lijevo – promjene u odnosu na isti mjesec prethodne godine, prikazan je posljednji mjesec svakog kvartala, bazna godina 2015)

Desno – promjene u odnosu na prethodni mjesec (bazna godina 2015)

Cijene proizvođača industrijskih proizvoda, u martu 2026. godine, su u prosjeku zabilježile rast od 3,5% u odnosu na isti mjesec prethodne godine. Cijene energije porasle su za 11,4%, intermedijarnih proizvoda osim energije za 3,7%, netrajnih proizvoda za široku potrošnju za 2,9%, dok su cijene trajnih proizvoda za široku potrošnju i kapitalnih proizvoda smanjene za 2,4% i 0,4% respektivno.

Grafikon 15: Kretanje cijena proizvođača industrijskih proizvoda




Izvor: Federalni zavod za statistiku

4. TRGOVINSKA RAZMJENA FBiH

Federacija BiH je, u prvom kvartalu 2026. godine, zabilježila pad izvoza i povećanje uvoza u odnosu na prethodni kvartal. Ukupan izvoz iznosio je 2,79 mlrd. KM, što je manje za 43,4 mil. KM ili za 1,5%, dok je ukupan uvoz iznosio 5,37 mlrd. KM, što je više za 80,6 mil. KM ili 1,5%. Time je vanjskotrgovinski deficit povećan za 124,0 mil. KM u odnosu na prethodni kvartal.


Grafikon 16: Obim vanjske trgovine Federacije BiH sa inostranstvom (mil. KM)



Izvor: Federalni zavod za statistiku

Posmatrano po zemljama sa kojima FBiH ostvaruje najveći udio robne razmjene, u prvom kvartalu 2026. godine najviše je izvezeno u Hrvatsku (542,3 mil. KM), što je za 18,1 mil. KM ili 3,2% manje u odnosu na prethodni kvartal, te u Njemačku (471,9 mil. KM), što je za 9,6 mil. KM ili 2,0% manje u odnosu na prethodni kvartal. Smanjenje izvoza zabilježeno je i prema Austriji i Sloveniji (za 4,3% i 3,1%, respektivno), dok je povećanje izvoza zabilježeno prema Srbiji i Italiji (za 4,9% i 2,4%, respektivno), u odnosu na prethodni kvartal.

Grafikon 17: Izvoz i uvoz FBiH po zemljama sa kojima se ostvaruje najveći obim vanjskotrgovinske razmjene



Izvor: Federalni zavod za statistiku

Najveći uvoz FBiH u prvom kvartalu 2026. godine ostvaren je iz Italije (685,8 mil. KM), za 8,9% više u odnosu na prethodni kvartal, te iz Njemačke (595,3 mil. KM) uz povećanje za 1,4%. Značajno povećanje uvoza ostvareno je i iz Srbije, za 5,9% (ukupan uvoz 432,5 mil. KM) u odnosu na prethodni kvartal. Smanjenje uvoza zabilježeno je jedino iz Austrije, za 3,3 mil. KM ili 1,8% (uvoz ukupno 184,0 mil. KM).

U odnosu na prvi kvartal prethodne godine, ukupan izvoz veći je za 12,4 mil. KM ili za 0,4%, dok je uvoz veći za 306,7 mil. KM ili 6,1%.

Posmatrano po zemljama, u odnosu na isti kvartal prethodne godine, u prvom kvartalu 2026. godine zabilježeno je značajno povećanje izvoza u Hrvatsku (za 73,9 mil. KM ili 15,8%), te u Italiju (za 20,1 mil. KM ili 11,6%), dok je prema ostalim najvažnijim vanjskotrgovinskim partnerima zabilježeno smanjenje izvoza.

Najznačajnije povećanje uvoza u prvom kvartalu 2026. godine ostvareno je iz Italije (za 172,3 mil. KM ili 33,5%) i Srbije (za 56,3 mil. KM ili 15,0%), dok je najveće smanjenje uvoza u odnosu na isti kvartal prethodne godine ostvareno iz Hrvatske (za 57,0 mil. KM ili 10,6%).

5. FISKALNA POLITIKA

Javni prihodi

Javnim prihodima smatraju se porezni prihodi, doprinosi, neporezni prihodi i ostali prihodi⁵. Prikupljenim javnim prihodima vrši se finansiranje javne potrošnje Federacije BiH, kantona, jedinica lokalne samouprave, vanbudžetskih fondova, nadležnih tijela za ceste i ostalih korisnika javnih prihoda u Federaciji BiH.

Ukupni javni prihodi u prvom kvartalu 2026. godine u FBiH iznose 3.486,1 mil. KM, što predstavlja pad za 127,2 mil. KM ili 3,5% u odnosu na prethodni kvartal, a rast za 94,7 mil. KM ili 2,8% u odnosu na isti kvartal prethodne godine.


5.1. Prihodi od indirektnih poreza

Ukupno raspoređeni prihodi od indirektnih poreza FBiH u prvom kvartalu 2026. godine iznose 1.328 mil. KM, što je niže za 110 mil. KM ili 7,6% u odnosu na prethodni kvartal, a više za 114 mil. KM ili 9,4% u odnosu na isti kvartal prethodne godine.

Od ukupnih prihoda za FBiH, raspoloživa sredstva iznose 1.091 mil. KM, što je niže za 166 mil. KM ili 13,2% u odnosu na prethodni kvartal, a više za 169 mil. KM ili 18,3% u odnosu na isti kvartal prethodne godine.

Sredstva namijenjena za otplatu vanjskog duga, te sredstva po osnovu posebne cestarine za izgradnju autocesta i drugih cesta, iznose 178 mil. KM i 59 mil. KM, respektivno.

Grafikon 18: Prihodi od indirektnih poreza doznačeni FBiH, mil. KM



Izvor: Uprava za indirektno oporezivanje BiH

⁵ Ostali prihodi utvrđeni zakonima i drugim propisima Bosne i Hercegovine, Federacije BiH, kantona i jedinica lokalne samouprave.


5.2. Prihodi od direktnih poreza

Prema podacima Porezne uprave FBiH, u prvom kvartalu 2026. godine naplaćeni su javni prihodi u ukupnom iznosu od 2.158,1 mil. KM, što je niže za 17,2 mil. KM ili 0,8% u odnosu na prethodni kvartal. U odnosu na isti kvartal prethodne godine, ukupni javni prihodi niži su za 19,3 mil. KM ili 0,9%. Najveće učešće u ukupnoj naplati ima Kanton Sarajevo (36,67%), a najmanje Posavski kanton (1,01%).

Od ukupno naplaćenih prihoda Porezne uprave FBiH, najveći udio imaju prihodi od doprinosa⁶ (66,9%). Ukupni doprinosi u prvom kvartalu 2026. godine iznose 1.444,8 mil. KM, što predstavlja pad za 70,5 mil. KM ili 4,7% u odnosu na prethodni kvartal. U odnosu na isti kvartal prethodne godine, prihodi od doprinosa bilježe pad u iznosu od 57,6 mil. KM ili 3,8%. U strukturi prihoda od doprinosa najveći udio imaju prihodi od doprinosa za PIO (54,5%), a iznose 786,9 mil. KM.

Prihodi od direktnih poreza⁷ iznose 494,4 mil. KM i viši su u odnosu na prethodni kvartal za 56,8 mil. KM ili 13,0%. U strukturi prihoda od direktnih poreza najveći udio imaju prihodi od poreza na dohodak (52,0%), a iznose 257,1 mil. KM. Prihodi od taksi, naknada, kazni i članarina iznose 216,9 mil. KM i, u odnosu na prethodni kvartal, niži su za 2,9 mil. KM ili 1,3%.

Grafikon 19: Prihodi od direktnih poreza, doprinosa i neporeznih prihoda u FBiH, mil. KM



Izvor: Porezna uprava FBiH

5.3. Udio javnih prihoda u BDP-u


Učešće ukupnih javnih prihoda u ekonomiji FBiH je stabilno. U prvom kvartalu 2026. godine čine 37,8% BDP-a. U prethodnom kvartalu ovaj udio je iznosio 37,9%.

⁶ Doprinosi za PIO, doprinosi za zdravstveno osiguranje, doprinosi za slučaj nezaposlenosti.

⁷ Porez na dohodak, na dobit, porez na promet nepokretnosti, porez na imovinu.

Najveće učešće u BDP-u imaju doprinosi koji čine 15,7% BDP-a. Prihodi od indirektnih poreza⁸ učestvuju sa 14,4%, prihodi od direktnih poreza sa 5,4%, a prihodi od taksi, naknada, kazni i članarina čine 2,4% BDP-a.

Grafikon 20: Udio javnih prihoda u FBiH u BDP-u, %



Izvor: Uprava za indirektno oporezivanje BiH, Porezna uprava FBiH, Federalni zavod za statistiku
Obrada: FZZPR


5.4. Javni dug

Procijenjeni obuhvaćeni dug prema raspoloživim podacima u Federaciji BiH sa stanjem na dan 31.03.2026. godine iznosi 7.004,33 mil. KM.⁹ Od ukupnog duga, 77,4% odnosi se na vanjski (5.420,43 mil. KM), a 22,6% na unutrašnji dug (1.583,90 mil. KM).¹⁰

U poređenju sa stanjem ukupnog duga na dan 31.12.2025. godine, bilježi se pad vanjskog duga za 141,8 mil. KM i pad unutrašnjeg duga za 40 mil. KM, što u konačnici rezultira padom ukupnog duga za 181,8 mil. KM ili 2,5%.

Udio ukupnog javnog duga u BDP-u na dan 31.03.2026. godine iznosi 18,7%, što predstavlja pad za 0,5 p.p. u odnosu na prethodni kvartal, a rast za 0,17 p.p. u odnosu na isti kvartal prethodne godine.

Grafikon 21: Javni dug u FBiH (mil. KM), udio javnog duga u BDP-u, desna skala



Izvor: Federalno ministarstvo finansija, Federalni zavod za statistiku; Obrada: FZZPR

⁸ Ukupno raspoređeni prihodi FBiH.

⁹ Izvještaj obuhvata cjelokupan vanjski dug u FBiH (uključujući dug kantona, općina, gradova i preduzeća) i unutrašnji dug centralne Vlade FBiH. Unutrašnji dug nižih nivoa vlasti i javnih preduzeća, izostavljen je zbog nedostupnosti kvartalnih podataka.

¹⁰ Procjena FZZPR, obzirom da Kvartalni izvještaj o dugu Q1 2026 nije dostupan u vrijeme izrade ovog dokumenta.

5.5. Penzije i doprinosi

Ukupni iznos isplaćenih penzija¹¹ bilježi rast u prvom kvartalu 2026. godine u odnosu na prethodni kvartal. Ukupne isplaćene penzije iznose 1,05 mlrd. KM, što predstavlja rast za 105,7 mil. KM ili 11,2% u odnosu na prethodni kvartal, a 162,8 mil. KM ili 18,3% u odnosu na isti kvartal prethodne godine.


Poredeći iznos isplaćenih penzija i naplaćenih doprinosa za PIO/MIO, primjetan je kontinuiran nedostatak u pokrivenosti penzija doprinosima. Dok troškovi za isplatu penzija snažno rastu (11,2% kvartalno i 18,3% godišnje), prihodi od doprinosa za PIO opadaju. To je dovelo do oštrog pada pokrivenosti penzija doprinosima na 74,8%. Dio rashoda za penzije koji nije pokriven prihodima od PIO doprinosa iznosi 264,4 mil. KM.

Pokrivenost u prethodnom kvartalu je iznosila 87,4%, a deficit 119,1 mil. KM. Obzirom da se penzije isplaćuju direktno iz Budžeta FBiH, deficit direktno stvara pritisak na Budžet FBiH i predstavlja rizik za njegovu tekuću likvidnost.¹²

Pokrivenost se kontinuirano povećavala od prvog kvartala 2024. godine (85,6%) do prvog kvartala 2025. godine (94,4%), odnosno deficit se smanjivao sa 112,9 mil. KM na 49,9 mil. KM. Pozitivan trend povećanja pokrivenosti, odnosno smanjenja deficita, prekinut je u drugom kvartalu 2025. godine. Oporavak je zatim zabilježen u četvrtom kvartalu 2025. godine.

Prosječan broj penzionera povećan je za 2.574 lica u odnosu na prethodni kvartal.

Grafikon 22: Isplaćene penzije i doprinosi za PIO (hilj. KM), pokrivenost penzija doprinosima za PIO (%), desna skala



Izvor: Federalni zavod za PIO/MIO, Porezna uprava FBiH; Obrada: FZZPR

¹¹ Redovne i zaostale penzije.

¹² Federalni zavod za PIO/MIO je službeno prešao na trezorsko poslovanje od 1. januara 2020. godine


6. FINANSIJSKO TRŽIŠTE

6.1. Profitabilnost banaka

Profitabilnost bankarskog sektora u FBiH, kao i pojedinačnih banaka u sektoru, posmatra se u kontekstu održivosti, odnosno stabilnosti nivoa i kvaliteta zarade i jačanja kapitalne osnove putem zadržane dobiti.

U prvom kvartalu 2026. godine, iskazan je pozitivan finansijski rezultat u iznosu od 153,7 mil. KM, što je za 5,8 mil. KM ili 3,9% više u odnosu na isti kvartal prethodne godine. Sve banke sa sjedištem u FBiH iskazale su pozitivan finansijski rezultat.

Grafikon 23: Neto dobit banaka u FBiH, hilj. KM



Izvor: Agencija za bankarstvo FBiH

6.2. Efektivna kamatna stopa

Sa ciljem veće transparentnosti i lakše uporedivosti uslova banaka za odobravanje kredita, te zaštite clijenata kroz uvođenje transparentnog prikaza troškova kredita, a u skladu s međunarodnim standardima, kriterijima i praksama u drugim zemljama, propisana je metodologija za jedinstven način obračuna EKS za sve banke sa sjedištem u FBiH, kao i za organizacione dijelove banaka sa sjedištem u RS-u, a koji posluju u FBiH. Izračun EKS za bankarski sektor zavisi, osim od visine kamatnih stopa pojedinačnih banaka, i od volumena i strukture novoodobrenih kredita.


Ukupna prosječna ponderisana efektivna kamatna stopa (EKS)¹³ na novoodobrene kredite sa 31.03.2026. godine u bankarskom sektoru FBiH iznosi 3,75%, što je blagi rast za 0,03 p.p. u odnosu na 31.12.2025. godine.

Posmatrano prema sektorskoj strukturi, prosječna ponderisana EKS na ukupne novoodobrene kredite privredi povećana je za 0,08 p.p. (sa 2,80% na 2,88%), a stanovništvu je smanjena za 0,12 p.p. (sa 6,35% na 6,23%). Činjenica da je ukupna stopa (3,75%) znatno

¹³ Prilikom analize trenda kamatnih stopa, relevantno je pratiti kretanje prosječne ponderisane EKS, obzirom da uključuje sve troškove koje korisnik plaća.

bliža stopi za privredu, nego onoj za stanovništvo, znači da novi krediti privredi čine veći dio ukupnog novoodobrenog kreditnog portfolija u FBiH.

Grafikon 24: Prosječna ponderisana EKS na novoodobrene kredite u FBiH



Izvor: Agencija za bankarstvo FBiH

6.3. Krediti


Ukupni odobreni krediti sa 31.03.2026. godine iznose 22,4 mlrd. KM, što predstavlja povećanje za 760,4 mil. KM ili 3,5% u odnosu na kraj 2025. godine.

Kreditni stanovništvu iznose 11,0 mlrd. KM, što predstavlja povećanje za 304 mil. KM ili 2,8% u odnosu na kraj 2025. godine.

Kreditni pravnim licima iznose 11,4 mlrd. KM, što predstavlja povećanje za 457 mil. KM ili 4,2% u odnosu na kraj 2025. godine.

Posmatrajući prethodne tri godine, bilježi se rast iznosa ukupnih kredita, uz konstantan odnos stanja kredita datih stanovništvu i pravnim licima.

Grafikon 25: Krediti stanovništvu i pravnim licima u FBiH, mlrd. KM



Izvor: Agencija za bankarstvo FBiH


6.4. Koncentracija bankarskog tržišta

Nivo koncentracije bankarskog tržišta je pokazatelj stepena konkurentnosti u bankarskom sektoru. CR je pokazatelj koncentracije u bankarskom sektoru i predstavlja ukupno učešće najvećih banaka u sektoru.¹⁴

Koncentracijska stopa tržišnog učešća pet najvećih banaka (CR5) iznosi 69,4% i blago je viša u odnosu na prethodni kvartal, kada je iznosila 69,1. Pet vodećih banaka (UniCredit, Raiffeisen, ASA Banka, Intesa Sanpaolo i NLB) i dalje drže dominantnu poziciju, kontrolišući skoro 70% ukupne aktive sektora.

Najveći skok u koncentraciji zabilježen je u četvrtom kvartalu 2022. godine, kada je i smanjen broj komercijalnih banaka sa 14 na 13.


Grafikon 26: Koncentracija bankarskog tržišta



Izvor: Agencija za bankarstvo FBiH

Herfindahlov indeks koncentracije kredita u prvom kvartalu 2026. godine iznosi 1.316, što ukazuje na umjerenu koncentraciju.¹⁵ Vrijednost indeksa je ista kao i prethodnog kvartala. Najveća koncentracija kredita zabilježena je u prvom kvartalu 2023. godine, kada je iznosila 1.343.

Grafikon 27: Herfindahlov indeks (kreditu)



Izvor: Agencija za bankarstvo FBiH

¹⁴ Koncentracijska stopa CR se označava prema broju banaka koje se uključuju u izračun. Što je veća vrijednost koncentracijskog omjera, to je veća koncentracija tržišta.

¹⁵ Za vrijednost indeksa manje od 1000, smatra se da na tržištu nije prisutna koncentracija, za vrijednost između 1000 i 1800 da je prisutna umjerena koncentracija, a za vrijednost iznad 1800 da postoji visoka koncentracija.